

COMUNICATO n. 3074 del 20/10/2025

Augelekk drinn in sèll boda khint getànt zo schütza un zo untarstütza di zungmindarhaitn

'Z geata vürsnen dar dienst zo zoaga ORF 1 un ORF Sport in gântz Trentino

[Cimbroy] 'Z geata vürsenen dar dienst zo zoaga di trasmisionen von kanél ORF 1 un ORF Sport in gântz trentino, a prodjèkt boda iz starch gepuntet in zungmindarhaitn, übarhaup in taütschan kamòuschaftn möknar un zimbar, ma boda ågeat alln. Nå in sèll boda iz khent auzgemacht vodar provintziàl Djunta, defatte, di diridjènten von Dienst vor di zungmindarhaitn un auzantn sachandarn hatt getànt allz daz sèll boda iz gest mångl nidarzoleda di konventziong pitt EI Towers, dar uantzege arbatar boda haltet da gântz nèt看 von kanél in ünsarne lentar. Di nümmar von kanél stian hèrta di gelaichegen zuargètt von ministér vor di firme un von Made in Italy pinn soinn dekrèt von 9 von prachant 2025: 'z soinn dar kanèl 75 vor ORF 1 un dar kanèl 76 vor ORF SPORT.

Dise kanél gem zuar z'sega gântz garècht da öffentlesche österrachege televisiong, disa iz a gruntliche initziatìf zo sichra 'z rècht zo maga hãm a televisìf informatziong vor di taütschan zungmindarhaitn. Darzuar lazzan seng di kanél ORF sterchart un gitt vèrt in prodjèkt Euregio Tiról-Südtiról-Trentino asó azpeda auzmacht a naüga radjonàl delibera o.

Di bölle vodar redjonàl Djunta zo vornaügra in dienst zo zoaga di kanél ORF 1 un ORF Sport helfft o zo khenna da taütsch zung un allz bazta ågeat dar österrachege realtèt, un in da gelaichege zait, macht vorstian pezzar in groaz vèrt boda hãm di zungmindarhaitn. Disa vorlegom, darzuar un sèll boda machan di trentinar lånt televisiongen, boda zoang nützlichè sachandarn vor berda lebet in Trentino, augehaltet dise o von Dienst vor di zungmindarhaitn un auzantn sachandarn vodar Provìntz, bill khemmen z'soina a prukk zbisnen in belese, ekonomische kultural raum un in sèll taütsch-österrachege pinn zil zo macha krescham ünsarne lentar.

Übarsetzt von Schaltarle vor di zung von Toalkamou vodar Zimbar Hoachebene

(cdt)